

Dany Koolman Rey di Tumba 2005

Publico tabata na fabor di Richard "Tattoo" Quandt



ORANJESTAD(AAN)— Sigur ta cu publico cu a presencia concurso di tumba e aña aki no a keda contento cu e decisió di hurado cu a duna Danny Colman a titulo, mientras cu tur hende tabata

sigur cu Tatoo Quandt lo a bay cu esaki y comentarionan na emisoranan tambe tabata muestra den e direcccion aki, y cu ayera tabata topico di conversacion hopi caminda. Danny Colman y Eugene



Albertz tabata e cantantenan cu a cuminsa pone marca den e concurso despues di presentacionnan di e

tipiconan.

Segidamente cu banda 3, Robert y su Solo Banda Show, Lion "Rupi Rupi" Croes cu su Jean Croix Palo Friu a trece mas movecion den direcccion di posible ganadornan y Joselito Geerman cu a canta cu "Carnaval, bo Fiesta" tambe a move e publico pa dreña den e posible ganadornan. Tabata te na di 7 banda musical cu Tatoo como cantante, cu a haya un tumba cu supuestamente lo por ta un ganador y cu lo por a domina esnan prome cune. For di e momento ey tur

comentario tabata dirigi riba Tatoo y ningun cantante a logra impone pa por a gana Tatoo mas.

Ora cu resultado a ser duna, a menciona Eugene Albertsz cu D-Bo cu e tumba "Suple peZona" na di cinco lugar, Lionel Croes na di 4 lugar, Joselito Geerman na di 3 lugar, y Richard "Tattoo" Quandt na di dos lugar y aki e publico a muestra su desaprobacion, y finalmente Danny Koolman mes a keda masha sorprendi cu toch el a logra e corona pa di dos biaha cu su tumba "E piscado".

Everick Rincones rey di tumba tipico

ORANJESTAD(AAN)— E experimento di e aña aki di parti ASOMA di duna Tipiconan oportunidad pa participa den concurso di tumba, a lanta expectativa grandi cerca otro tipiconan, según comentarionan cu por a scucha diasabra anochi di musiconan y dirigentenan di varios agrupacion tipico cu no a participa y cu a laga sa cu otro aña si nan ta den e concurso.

E expectativa ta cu pa otro aña lo mester cuminsa separa e concurso tipico caba for di e concurso di bandanan, pasobra si bini acerca 7 tipico mas y cada un cu un cantante manera diasabra anochi, ta mas di 3 oralo ta ocupa caba. E presentacion di e siete tipiconan a dura net un ora ey mey diasabra.

ÉXITO

E entrada di tipiconan por ser considera como éxito, y mester menciona cu na momento cu e publico no tabata mucho grandi paden, pafu tabata tin dos pa tres biaha mas tanto hende sperando pa dreña, pero e control riguroso di seguridad a pone cu e entrada di publico a bay masha poco poco.

Pa ora cu e di tres tipico a cuminsa toca, ya e centro tabata bastante yen di hende y cu a sigui yena te cu ora cu e bandanan mes a cuminsa toca, Entertainment Center di Piedra Plat tabata completamente yen.

For di momento cu Tipico Poko Loko a habri cu Eldrick panneflek, e publico a cuminsa move.



Tabata Ronwayne Kock cu Amor pa Folklore cantando "Di 35 y e number 1" den cual el a duna honor na e mihor tumbanan di 35 aña, cantando parti di e tumba nan aki den su cancion, cu Ronwayne a bira un favorito.

Rafael Flanders cu Los Amigos no por a impacta cantando tras di percusión di manera cu no por a goza di un presentacionumbero di djé. Admirable tabata e presentacion di Frank Croes cu Pegasaya. Frank Croes cu su sonfonia di boca a encanta e publico y Jose Giron aduna bon presentacion cu "Den carnaval dune su cos", pero no fuerte pa gana.

Fuerte tabata Everick Rincones cu su wea di boonchi; su lele, pa lele e bonchi cu percusión pisa di papito Rafael y su bailadoman criollo pa duna forza na su "Boonchi di carnaval".

Everick a resulta na e momento ey e cantante cu lo competi cu Ronwayne pa e titulo.

Ola Tropical tabata tin Ricardo v.d. Biezen como cantante di "Cla pa yangele" y Ricardo a demostra cu e ta bin fuerte pa titulo y mes ora a bira un di e favoritonan tambe pa por bay cas cu e corona.

Aki a keda spera riba presentacion di Tipico Laboratorio y amigonan cu e cantante Tico Petrochi. Tico su introduccion tabata duna algo di e "himno di carnaval", e tumba "Carnaval" di Edwin Zichem componi pa Rufo Wever (dif). Su presentacion tabata un mescla entre Juan Kock y Edwin Zichem y bon presenta, pero no suficiente pa gana e corona.

Finalmente tabata Everick cu a bira Rey tipico di tumba 2005, cu Ronwayne na di dos lugar y Ricardo v.d. Biezen na di tres lugar.

TELEFONNAN DI DIARIO
582-6747- FAX 582-8551